



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Distritu Dili

8 Jullu 2015

**Tinan Lima Implementasaun Lei Kontra Violénsia Doméstika: Persija
hametin kolaborasaun instituisaun relevante sira**

Iha 7 Jullu 2015, Lei Kontra Violénsia Doméstika kompleta tinan 5 ba implementasaun no tinan lima ne'e nia laran hatudu progresu nomós ezijensia ba kolaborasaun institucional ne'ebé diak liutan iha futuru.

Prezensa lei ne'e hatudu progresu significativu iha aspetu konsensializasaun publiku kona-ba violénsia doméstika hanesan krime publiku. Ida ne'e pozitivamente aumenta feto sira nia desizaun atu lori kazu ba sistema justisa formal. JSMP rejista iha tribunál distritál hotu katak kada loron sempre iha julgamentu kazu violénsia doméstika. Realidade ida ne'ebé antes ne'e dala ruma so iha deit kazu ida ka rua ne'ebé julga iha semana ida nia laran.

JSMP mós observa progresu sira relasiona número kazu violénsia doméstika sira ne'ebé lori ba tribunál. Bazeia ba monitorizasaun JSMP husi Janeiru 2012 to'o Juñu 2015, kazu violénsia doméstika ne'ebé mak JSMP monitoriza hamutuk 1092.

Hosi totál kazu 1092, iha kazu 15 ne'ebé involve krime omisidui, tentativa omisidui, ofensa ba integridade fizika grave no violasaun seksuál konklui ho pena prizaun no kazu 7 mak hetan pena suspensaun ho dever adisionál atu apresentaan iha estasaun polísia.

JSMP observa katak kuaze kazu sira involve ofensa ba integridade fizika simples no maus tratus ba konjújé maioria konklui deit ho pena suspensaun, multa no pena admoestasaun no entre Janeiru 2015 too Juñu 2015 iha kazu 6 deit mak konklui ho pena prizaun efetiva.

JSMP kontinua defende katak sentensa ne'ebé konklui deit ho pena suspensaun sei la produz efeitu prevensaun tanba kondenadu no vítima sira-nia koñesimentu iha prosesu formal ne'ebé sei limitadu relasiona sentensa ne'e rasik. JSMP mós hanoin katak pena multa la'os opsaun sentensa ne'ebé aporiadu ba kazu sira violénsia doméstika. Tanba pena multa sei hatodan liu tan ekonomia familia no JSMP rekomenda ba tribunál atu fo prioridade kompenzasaun sivíl ba vítima sira iha kazu violénsia doméstika.

Iha tinan 2014 no inisiu tinan 2015 JSMP kontinua rejista progresu ba desizaun sira tanba, mezmu tribunál aplika pena suspensaun ba arguidu sira, maibé tribunál mós aplika pena adisionál seluk hodi prezentaan iha estasaun polísia kada fulan dala ida.

Mezmu nune`e, JSMP mós observa katak iha kazu ameasa no danu embora komete iha relasaun familia, maibe tribunál la konsidera hanesan krime ho natureza violénsia doméstika. Kestaun ne`e mosu tanba iha artigu 35 Lei Kontra Violénsia Doméstika la inklui krime amesa no danu hanesan krime públiku.

Iha artigu 25 Lei Kontra Violénsia Doméstika defini katak vítima sira violénsia doméstika iha direitu atu hetan asistensia no akonsellamentu legál hosi defensor no advogadu sira durante prosesu justisa formal, maibé JSMP observa katak provizaun ne`e la iha efeitu iha prátika.

Aleinde ne`e, iha artigu 22 Lei Kontra Violénsia Doméstika kona-ba asistensia iha ospital sira hodi fornese ezaminasaun forensiku/mediku ba vítima violénsia doméstika no atu fó hatene kedas faktu sira ne`e ba autóridade polísial sira ka ba ministériu públiku. Maske nune`e, JSMP observa katak artigu ne`e mós la konsege implementa adekuadamente no maioria proseu ezamizasaun forensiku-mediku sempre mai deit husi Pradet.

Atu aseguara katak lei ne`e iha kbiit atu proteze no prevene violénsia doméstika, JSMP ejize entidades relevantes sira atu bele halo tuir ida-idak ninia obrigasaun tuir provizaun sira ne`ebé mak defini ona iha Lei Kontra Violénsia Doméstika no instituisaun sira ne`e tenke hatene katak ne`e obrigasaun tuir lei,” dehan Luis de Oliveira Sampaio, Diretór Ezekutivu JSMP.

JSMP rekomenda atu hadia artigu 35 Lei Kontra Violénsia Doméstika hodi inklui artigu sira konsidera krime ameasa no danu nu`udr forma husi violénsia doméstika kuandu aktu ne`e komete iha âmbito no relasaun familia.

Iha Janeiru 2015 JSMP no ALFeLa hamutuk ho NGO sira ne`ebé mak durante ne`e servisu atu proteje fetu no labarik sira nia direitu lansa no intrega ona submisaun ba Parlamentu Nasionál. Submisaun ne`e diskuti provizaun sira iha Kódigu Penál no Lei Kontra Violénsia Doméstika no husu ba Parlamentu Nasionál atu amenda Lei Kontra Violénsia Doméstika hodi inklui krime ameasa no danu ne`ebé akontese iha familia nu`udar forma husi violénsia doméstika.

Atu hetan informasaun kle`an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail, luis@jsmp.minihub.org